

貴池縣志

貴池縣志卷八

知貴池縣事陸延齡重修

輿地志

古蹟

舜井

寰宇通志舜南巡時鑿宋志井在城之中心麻皮巷今呼大井是也乾隆志正德初知府祁司員重開

石城故縣

江南通志在府西七十里地名鐵店亦曰倉埠潭以東西兩石山夾河如城故名漢置縣

吳非漢石城廢縣記

自秋浦貴池之稱著而石城遂隱藏質於竟陵作石城樂古辭有莫愁石城西於是金陵與竟陵以莫愁石城互相撫今

貴池縣志

卷八

輿地志 古蹟

一

池州之石城無爭矣漢書丹陽郡置石城縣屬石城分江水首受江東至餘姚入海過郡郡行千二百里後此之名石城者不一而漢舊縣之見諸史者亦不一池州貴池新舊志稱吳程普鎮韓當侯黃蓋守長耳三國志當子綜襲封蓋傳教諸椽文普之討宣城陵陽諸賊及從討劉勳於尋陽進攻黃祖於沙羨仍還石城鎮不備載餘闕漏可知也後漢書王廣徙封石城侯綱目漢孫策西擊黃祖行及石城聞勳在海昏策乃與周瑜襲皖城破之宋書劉劬胡眾既散至石城陳懷真斬胡張產亦追胡未至石城數十里殺懷真而竊有其功

梁書封大欵石城公侯景之叛矯詔遣石城公爲質解外援
軍迄簡文立封石城公爲江夏郡王陳書顧溯稱前甯遠石
城公外兵參軍王位以垂文梁諸王多爲甯遠將軍惜名不
傳隋書亦溯稱崔仲方賜爵石城縣男邑三百戶崔故齊官
故或守長而都尉而侯而公或遙封而鎮而徙而道或沿革
仍舊屬割別附郡皆從漢石城名則皆今貴池地也他如班
超攻姑墨石城段熲擊石城羌此樓蘭之石城鎮也晉書周
訪庾亮戴洋陶侃張天錫諸傳所稱石城綱目元魏楊忠乘
勝至石城進逼江陵此安陸州之石城也夫自羊祜都督荆

州據險開建五城石城以西盡爲晉有其非縣明甚祜傳吳
石城守去襄陽七百餘里每爲邊害是吳有石城祜因之憑
恃增高耳明初承天府爲安陸州在後周爲石城乃集覽於
楊忠所至之石城注郢州郢卽安陸又于庾亮所鎮之石城
注汝甯信陽州未敢云據矣今淮安之海州爲唐東海之石
城今永平之盧龍爲唐北平之石城今惠州之河源爲唐海
豐之石城今重慶之彭水黔江爲隋巴東唐黔中之石城今
之曲靖爲唐莊州之石城此隋唐書皆稱縣而今不石城名
者也唐崔燾封石城縣男其屬於東海耶北平耶海豐耶黔

中耶不可知矣宋文天祥遣趙時賞以一軍取道石城復甯都此贛之石城也南唐更割地析置則今贛之石城爲劉宋之甯都卽漢之贛矣唐仍梁羅州本石城郡析置縣則今辨州之石城爲趙宋之吳川卽漢之高涼矣兩石城今仍稱縣若漢所置石城縣惟今貴池耳志稱姑孰敍州樂平東陽永康皆有石城山潤州有石城鄉雷州有石城所常熟有石城真定曲陽有元石城皆宋王懋叢書僅云兩石城一在金陵左思所謂戎軍次於石城也一在竟陵莫愁所居之石城也已不知貴池之石城爲漢縣且以庾信賦爲左思屯石城爲

貴池縣志

卷八

輿地志 古蹟

三

次石城矣余嘗從里中出入道琅山望石城漢舊縣低徊不能去逢父老子弟及過客譚古今石城同異析省置廢因辨之以告來者

清風亭

舊志在迎恩門外里許

明 丁鵬清風亭詩

肅拜荒祠奠酒卮清風千古動遐思茫茫烟水江南路何必羊裘惹故知

本朝

王元梅清風亭詩

一坵高士土落日草青青有術驅神雨無人識客星風聲摧

斷碣山色隱空亭遙憶羊裘叟寒烟隔釣汀

虎林城故址

三國志權封第六子休為琅琊王居虎林綱目質實虎林城在池州城東二十五里明一統志在石

城東十五里江南通志在府西六十五里孫吳時為戍守處康熙府志在城西六十五里乾隆府志在郡城東二十五里

元 貢奎虎林城元妙觀

琳宮古崔嵬獨據山勝絕天光垂帝座照耀金碧色修廊接

層厓俯目視深澤陰陰木葉暗石削蒼壁列流泉出嵌空六

月灑飛雪平生功名謀洗我肝肺熱同遊得幽人再拜摩斷

碣興亡見漢唐高爽勝吳越更擬窮幽探馳景忽西滅

喬府

舊志在七柯松南阪三國時喬氏居此元末明初浚井者得鑰匙牌上鐫喬府二字

貴池縣志

卷八

輿地志 古蹟

四

南太原郡

名勝志南太原郡梁大同閒立旋廢在城西七十里即寄治石城建德亦有太原城皆僑立也

吳非梁南太原郡城考

江淮閒三國時為戰爭之地人避而不居者各數百里晉平

吳民乃各還自元帝立江左後流徙而南者或居江北或居

江南或江北而更徙於江南皆寄也因僑立州郡以治之所

以安之也隋九江郡之在梁也梁置太原郡領彭澤晉陽和

城天水平陳郡縣並廢立龍城縣開皇十八年改名彭澤梁

書無志略附見於隋書稱太原未嘗分南北以禹貢州圖領

之彭澤與晉陽和城天水詎相及乎夫詩咏太原即春秋之

晉陽也故冀州域漢天水爲秦州故雍州域南太原宋屬秦州僑襄陽齊僑漢中南天水宋治巖州屬雍州僑襄陽齊仍焉和城宋新立故豫州南頓域齊公屬豫州之南汝陰西南頓又分屬南豫州之廬江皆寄治也梁承齊又統以太原別立晉陽和城天水僑彭澤其流徙者蓋未已矣齊書晉宣城舊豫章封內豫章之東北相去懸遠故以屬揚州時彭城屬豫章之東北宣城之石城當豫章之東北明胡纘宗安慶府志于隋彭澤注云卽宣城夫豈無據時石城改秋浦仍宣城屬宋書州郡志亦闕焉按陳書王琳湓城之爭梁江州已分

南北石城彭澤統於北江州是固舊豫章封內也南太原郡之僑于石城彭澤間可知也彭澤志晉陽廢縣在東北一百九十里和城廢縣在東北二百二十里天水廢縣在東五十里太原郡城在北五十里亦不云南太原與隋書俱非矣惟名勝志稱南太原郡城梁大同閒立旋廢在城西七十里以今城西七十里蓋卽石城石城其所寄也隋書不並注石城而僅注彭澤以附載不必致詳彭澤新志遂引之以爲徵耳貴池志又云建德有太原城此爲廢而徙立猶齊之和城旣屬南汝陰又屬西南頓又屬西南分而散寄託籍暫安未必

環城郭爲衛也建德志不載無乃闕乎以其道里方所彭澤石城壤相接東流故唐析秋浦之太原鄉予至德南唐析貴池之晉陽鄉益東流太原本石城僑立名自梁其或土斷而籍離或事平而復還其故猶江左之繁昌本豫州襄城屬僑襄城及繁昌于春穀乃襄城還而繁昌寄矣然則繁昌可因之以名縣太原晉陽亦可因之以名鄉也余故爲考焉以俟知者

文選樓

江南通志在府西貯昭明文選處今僅存其址府志邑中有二一在秀山一在西廟

本朝

喻成龍重建文選樓碑記

貴池縣志

卷八

輿地志 古蹟

六

池郡西南七十里曰秀山奇峭盤鬱爲郡奧區地接秋浦方廣數十里昔人云此中有瀟湘洞庭之勝鞅掌簿書未暇登覽歲己未郡大饑集同官議輸賑余得載穀菽具糧糗按行分賑焉村墟里井足跡殆遍問卹之餘亦可以遊目騁懷乃約輕舟取路秋浦長江西來千林夾水明滅浮空抵秀山巒壑洞駭如有雲簾翠幃珊珊其來與向之澄泓駘宕一碧萬頃者相爲瀜注蓋一奇也山之阿林木蔚然知爲梁昭明廟祀土人云昭明好遊嘗過此愛山水秀逸作書樓燕賓佐棲遲嘯咏者久之梁大同後薨逝邑人因相與詣建康請其衣

冠而瘞之祠立靈祉洵臻焉唐永泰初改置郡邑立廟郭西而秀山書樓僅存其址余毅然新之以妥神庥神其永福我池人也哉考五代史傳昭明非好爲遠遊者也幼喜讀書能文章武帝躬定大業四方多虞太子方始服欲練習軍國每奏書言事皆勅裁決頗中機要甚愛重之帝又銳意文治命殷芸編說蕭方撰史太子自省錄朝政外卽退與芸方輩及四方才俊如韋叡任昉徐勉許懋諸人參訂著述集書至三萬卷事母丁貴嬪孝侍疾不免冠憂結致病戒左右勿宣洩恐傷帝心會有諮勅必整容對使者裁答如平時卒之日朝

野多哀思之傳曰昭明從帝諡也祠曰文孝著名實也閒一遊覽則太平有淨居室廣陵有文選閣襄陽有讀書臺南雄有始興院然襄陽貴嬪戚里之鄉南雄舊臣監郡之所懷思建置非所親歷而太平廣陵建業近輔但一涉足而已靡不表閭葺宇以志不忘況秀山秋浦爲太子優游嘯咏悲感棲託之地也哉是又烏可不急新其祠也神昭於天而萃於廟近代傳述靈異有旌廉吏而報以錢旗拯饑年而降以米舟之事則文孝昭明宜馨香俎豆垂於無窮者也爰立之石載德敷辭而爲之記

陳蔚文選樓賦

繁蕭梁之帝胄抗逸志于縹緗開千秋之選席萃七代之文章高齋既集於襄沔層樓復跨乎維揚何石城之邈迤亦傑閣之飛翔原夫野值斗牛天分吳楚虎林傳孫氏之城鵲岸爲夷昧之士檀珪之遺跡猶存高獲之清風可數庾子山則賦及梅根陶彭澤則詩吟菊所本建業之屏藩卽荆湘之門戶爾乃審形勢而面齊山開丕基而負杜隴近接杏花之村遙連楊葉之渚北望清溪西鄰秋浦六峯崑岷以南撐九子崢嶸而東拒盡指顧之烟霞悉掩映乎簷宇則有虹梁月射

虬柱雲連芝栢縹緲蘭橈嫵娟飛甍鳳翥刻桷鸞翩銀榜璇題並耀金鋪玉碣爭鮮旣規模之狀麗復版牒之紛然想其召英流延詞客陳斐几據講席韋叡則達曙張燈徐勉則通宵談月彥昇之才調縱橫士秀之詞華絡繹許昭哲爲風雅之倫賀德榘則儒林之傑萃萬卷以參稽綜羣書以考核摘天祿之菁英傾石渠之瀝液甲乙百家鉛黃六籍繡帙映夫丹青牙籤耀乎金碧爰觸緒以興懷更撫今而追昔當夫春暉莫報朝露空垂玉魚葬而腰圍半減蠟鵝出而骨肉懷疑嗟讒言之易入實仁孝而誰知又若宴元圃泛後池摘芙蓉

於彫舸蕩楫權於妖妃何前星之忽沒竟繼照之無期羽翮
驅兮不返金華閉兮長辭悼往事之如昨剩高閣之在斯彼
夫石闕峩堯玉衡耀眩起朝日以光凝構重雲而彩絢千尋
安樂之宮百尺合歡之殿莫不銅瓦鱗鱗琲楹疊疊無何紫
燄起而棖朋寶劔飛而柱折滕王之蛺蝶空飛臨春之綺羅
旋滅他若光宅談經之寺雨花說法之臺同泰之浮圖突兀
長干之塔院崔嵬龍堂兮矗起佛窟兮宏開亦復殘垣蔓草
古道荒苔獨斯閣之不朽峙水曲與山隈時則有寶馬喧闐
畫輪旋繞陟碧磴之嶽崿散羅幃之窳窳或把盞清吟或憑

貴池縣志

卷八

輿地志 古蹟

九

闌長嘯記推鍾世美之篇詩首羅江東之調遠懷香鯽之風
猶想玉潭之釣惟帝子之不來付遙情于憑弔歌曰高閣何
年起巍巍聳碧霄文章遺韻遠山水奏雲韶又歌曰湖山景
物春城郭千古芳蹤文選閣不見當時珥筆人東風空自搖
簷鐸

宋

李廌文選樓

申轅應楚聘鄒枚適梁苑蕃侯喜賓客賢賢易鷹犬黃綺遊
漢庭羽翼繒繳遠秦府十八公攀附名益顯昭明眾才子文
囿俾蒐選高齋砌浮雲雉堞俯晴巘尙應愧兩閒筆削非大

典

明
陳忠文選臺詩

遊觀猶不廢詩書天錫皇儲作大儒莫謂蘭亭將泣玉從來
滄海有遺珠

本朝
吳綺憶文選樓送宗鶴問官其地

西風吹雁度江濱送客還疑望遠親地藉文章傳勝蹟天畱
臺榭與才人池魚入饌香羹美山鶴聞琴舞態新到日樓頭
應有憶不須鄉夢往來頻

宗觀文選樓看紅葉詩

貴池縣志

卷八

輿地志 古蹟

十

勝蹟維摩近水樓霜空雲物楚江秋半村紅樹漁舟出隔岸
青山酒幔收指點南天銷遠燧招攜西苑美清游蕭梁文藻
來崔亮對客揮毫到上頭

王夢齡登文選樓詩

高樓百尺貯瓊琚帝子風流想像餘七代詞章無選本六臣
搜輯有遺書聲光籠蓋齊梁末筆削遙從漢魏初莫問蠟鵝
當日事臺城雉堞已成墟

昭明釣臺 江南通志有二一在鎮山下一在和龍山下有玉龍潭府志有二一在池口一在琅崖宋蔣之奇訪夏氏

白面山居有云難尋荀鶴舊遊宅尚有昭明古釣臺指此

按通志玉龍潭當作玉鏡潭

明 孫仁昭明釣臺

梁苑當年禾黍生儲君猶有釣臺名鼎湖龍去髯何在磐石
苔深跡未平日落空林巢宿鷺烟橫煖浪躍潛鯨沿堤種得
如絲柳猶訝長綸拂水輕

香鯽蕩 秀山志在秀山下四隅皆山石為岸中產鯽魚甚美明
中使致祭昭明必取香鯽作貢邑以為累尚書孫仁奏
停

放生池 秀山志梁昭明太
子放生魚於其中

花園 舊志有二一在鎮江門內元萬戶曲律不花游憩
之所一在西廟之後世傳梁太子遊翫之處今廢

貴池縣志

卷八

輿地志 古蹟

十一

秋浦故縣 舊志在石
城間隋置

唐 李白秋浦歌

秋浦長似秋蕭條使人愁客愁不可度行上東大樓正西望
長安下見江水流寄言向江水汝意憶儂不遙傳一掬淚為
我達揚州

秋浦猿夜愁黃山堪白頭清谿非隴水翻作斷腸流欲去不
得去薄遊成舊遊何年是歸日雨淚下歸舟

秋浦錦駝鳥人閒天上稀山雞羞綠水不敢照毛衣
兩鬢入秋浦一朝颯已衰猿聲催白髮長短盡成絲

秋浦多白猿超騰若飛雪牽引條上兒飲弄水中月
愁作秋浦客強看秋浦花山川如剡縣風日似長沙
醉上山公馬寒歌甯戚牛空吟白石爛淚滿黑貂裘
秋浦千重嶺水車嶺最奇天傾欲墮石水拂寄生枝
江祖一片石青天埽畫屏題詩畱萬古綠字錦苔生
千千石楠樹萬萬女貞林山山白露滿澗澗白猿吟君莫向
秋浦猿聲碎客心

又秋浦寄內詩

我今潯陽去辭家千里餘結荷捲水宿郤寄大雷書雖不同

辛苦愴離各自居我自入秋浦三年北信疎紅顏愁落日白
髮不能除有客自梁苑手攜五色魚開魚得錦字歸問我何
如江山雖道阻意合不爲殊

代內作

寶刀裁流水無有斷絕時妾意逐君行纏絲亦如之
別來門前草秋巷春轉碧埽盡還更生萋萋滿行跡
鳴鳳始何得雄驚雌各飛遊雲落何山一往不見歸
估客發大樓知君在秋浦梁苑空錦衾陽臺夢行雨

又贈秋浦柳少府

秋浦舊蕭索公庭人吏稀因君種桃李此地忽芳菲搖筆望
白雲開簾當翠微時來引山月縱酒酣清暉而我愛夫子淹
畱未忍歸

又贈崔秋浦三首

吾愛崔秋浦宛然陶令風門前五楊柳井上二梧桐山鳥下
廳事簷花落酒中懷君未忍去惆悵意無窮

崔令學陶令北窗常晝眠抱琴時弄月取意任無絃見客但
傾酒爲官不愛錢東皋春事起種黍早歸田

河陽花作縣秋浦玉爲人地逐名賢好風隨惠化春水從天

漢落山逼畫屏新應念金門客投沙弔楚臣

杜牧秋浦道中

蕭蕭山路窮秋雨淅淅溪風一岸蒲爲問寒沙新到雁來時
還下杜陵無

羅隱秋浦

晴川倚落暉極目思依依野氣寒來淺人家亂後稀久貧身
不達多病意常違還有漁舟在時時夢裡歸

又春日憶秋浦有寄

烟火濛濛接板橋數年經歷駐征橈醉凭危檻波千頃愁倚

長亭柳萬條別後故人冠獬豸病來知已賞鷓鴣清流夾宅
千家住會待閒乘一信潮

李中維舟秋浦逢故人張炬同泊

卸帆清夜碧江濱冉冉涼風動白蘋波上正吟新霽月岸頭
恰見故鄉人共驚別後霜侵鬢互說年來病逼身且飲一壺
消百恨會須遭遇識通津

宋

曹清秋浦行

秋浦四時秋行行蕩我魄崎嶇度清淺幽嵐花氣襲黃山嶺
上雲白竒波中月水發秋浦源山結秋浦脈剩有垂釣磯攜

貴池縣志

卷八

輿地志 古蹟

十四

尊呼太白徘徊復何往移情此朝夕

元

曹天祐秋浦宛似瀟湘洞庭圖

李白昔愛秋浦縣萬里長江看匹練何年寫作秋浦圖一幅
烟雲三丈絹揮毫潑墨如有神至正以來無此人匡廬蠹帆
等眉睫點染不數桃花津波濤一望中天瀉小艇乘風似奔
馬黃河遠聽疑若聞淮海抱澁近灑灑我嘗攜此走畿甸萬
浪千濤眼中見猶記都門送別時回頭卽覩長江面歸來重
展向高堂鄉鄰大小攜壺漿欲借浦圖一觀看江南江北雲
茫茫

本朝
黃景仁秋浦懷李白

爲愛池魚美停車又幾時如何我行處每見爾題詩花發清
溪館苔荒苦竹祠青天明月在何處不相思

秋浦洋池 秀山志在甯福寺

李白書堂 江南通志一在苦竹嶺一在桃波

太白亭 采訪冊太白在培湖李宅前碧潭觀魚并建石亭有詩曰觀魚碧潭上木落潭水清日暮紫鱗動圓波處處生

涼煙浮竹盡秋月照沙明何必滄浪去茲焉可濯纓後人因名其亭曰太白遺風

李白釣臺 府志在江祖石

戴昺同郡博黃次夔遊江祖太白釣臺

貴池縣志

卷八

輿地志 古蹟

十五

翰林天酒星謫墮人間世豪氣渺乾坤浪迹寄湖海峩峩江
祖石片石峙西澨醉狂御風來踞坐高傲睨一絲聊戲垂意
得在魚外青天畫屏句妙越無塵界至今五百年春虹絢晴
彩我來訪遺蹤躡屐捫薜荔錦苔剝冰霜髣髴題字在屬時
春夏交微雨弄輕霽同遊俱嘉朋笑語洽傾蓋雲木團晝陰
松風奏天籟勝踐心已愜酣歌意彌快欲招臺上魂舉爵酬
清泚今昔自殊時欣感諒一契長嘯下歸舟驚湍送飛棹

蕭相樓 舊志在城東毓秀門乾隆戊午李太守璋做唐故址建石樓後圯嘉慶二十年邑人蕭承謨重修其郡志所載

府署西北
隅者久廢

鞏疇講堂

舊志在元三保花園嶺下距城南二十里今廢

李方元書堂

雲巢編景業讀書處基構有遺躅景業方元字也齊山志堂在化城窩中李方元唐會昌間來刺池

愛此幽勝故築堂焉

楊梅館

江南通志在府西九十里石嶺多楊梅唐有楊梅館宋改為驛今呼楊梅坦

唐

白居易楊梅館

十一月中長至日三千里外遠行人若為獨宿楊梅館冷枕

單牀一病身

翠微亭

江南通志在齊山之巔九華清溪秋浦隱屬望中齊山圖畫志亭由雲梯北上山巔舊傳杜牧九日登高在

此其亭自宋迄明屢建屢圯見成化中胡廣文昱崇禎末程副使世昌記中本朝太守郭世純重建

貴池縣志

卷八

輿地志 古蹟

十六

明

程世昌翠微亭記

齊山名勝官其地者不謂與山無緣顧余蒞任甫匝月猝有
兵事城門晝閉四十餘日于陬刁斗之是勤僅而獲濟指點
數峯疑在天外兵已退池老父子弟漸樂更生余乃從諸君
請躡屐盡一日力遍搜諸勝而山陂陀處有阜隆起軒櫺四
闢者則翠微亭也登其上列巘浮蒼平湖匯碧來遠聚景不
啻點睛於石之眸而益毫於谿之頰也惜歲久傾欹蕪穢不
治會有兵掠餘貲應入官帑者斥賣得四十緡畀工修葺使
礎柱得固焉丹雘得新焉可以觴詠可以徘徊見茲山最勝

處則已矣蓋余既熟視池父老子弟從執爿登陴後殊有解衣賞酒之思張而不弛無以導和宣鬱亦三時之勤一日之蜡也至池力詘矣以其贏資飾治游榭此又如王丞相營江左不足而示之以有餘也修廢舉墜何一非命使者事而謂是爲得已之役乎哉亭仍舊名蓋杜樊川九日登高語余未暇他引姑志修亭歲月以告來者且以識山靈一日之緣也

宋

孔平仲翠微亭

蠟屐縈紆洞府閒飛甍人在最高巔青山東去無餘地黃潦西來正接天太子池塘烟漫漫紫微蹤跡草芊芊松枯石朽

貴池縣志

卷八

輿地志 古蹟

十七

由來事莫作常情歎逝川

周必大翠微亭

地占齊山最上頭州城宛在水中洲蜿蜒正作長虹墮吸住江河萬里流

遊已還寺再登翠微亭次湯平甫韻

上清別殿舊通明仙聖飛騰戶不扃出郭尚疑窗列岫絕堤始露嶽眞形奇奇怪怪無非洞下下高高總可亭但把醺酣酬絕景天風吹面徑須醒

明

董其昌登翠微亭

烟迷楊柳洲水拍芙蓉岸我憶南湖秋西山暮雲亂

陶安九日登翠微亭分韻得滿字

山川眞雄麗積雨爲磨澣天開秋氣清遊娛共蕭散石徑接
巉巖興到行不懶微霜護新晴杲日送餘煖層嶺躡高寒境
勝世所罕蒼茫四無極自恨目力短危亭基蘚殘麋鹿荒町
睡居然龍虎勢城郭在平坦崇阿弔離宮老木蔭僧館松雪
引徐步蘭露入清盃況當重九節野菊相畱欸賓朋笑語閒
文理謝雕纂好風襲尊俎幽鳥哢絲管人生光景速每恨樂
事緩佳會幸一逢何辭累觴滿

貴池縣志

卷八

輿地志 古蹟

十八

汪珊同陳侍御遊翠微亭

望望孤岑際參差上翠微拂塵摩古刻衝蘚振華衣霜冷水
雲涸山晴嵐霧稀從容陪勝賞竟日擬停騑
使節臨郊野榮光照草堂幡搖雲樹影袍拂洞天香空澗潑
欹榭殘鴉背夕陽願言宣雅調寒谷發幽芳

章璧翠微亭

曳杖穿雲躡翠微幽亭高構隔禪扉殘碑剝落生秋草畫棟
虛明映夕暉九日題詩人已去半山落木鳥空歸登臨且盡
尊前興莫歎當年往事非

章瑩翠微亭

載酒僧房飲欲闌清風徐引上層巒路通疎竹林中過琴拂
枯梅樹下彈歸鳥穿蘿雲影亂飛泉濺石雨聲寒盡收風月
奚囊裏一笑不知天地寬

許宗魯同柯獅山飲翠微亭次杜韻

露冷空江木葉飛孤亭嵐靄坐霏微邊鴻影落書難到野菊
花開人未歸巖宿高雲寒暝色湖搖西日蕩秋暉招遊況有
山川主送酒何須望白衣

柯相次許少宰飲翠微亭韻

貴池縣志

卷八

輿地志 古蹟

十九

山亭雅集羽觴飛妙境冥深路轉微塵世菊花遺咏在江天
鴻雁好音歸清風載道先秋爽白雪連篇照夕暉喜共乘驄
天上客曠懷欲典故人衣

貴池亭

江南通志在府城北五里磯上俗呼爲望江亭唐杜牧
詩勢比凌敲宋武臺分明百里遠帆開蜀江雪浪西江

滿強伴春
寒去卻來

紫微亭

齊山志在竇雲
巖唐建今圯

宋 梅堯臣池州紫微亭

江雲如旗脚墨點飛雁行平圃采芳菊上水酌桂漿爲言此
何時杜子逢重陽醉思莊生達晒彼齊景傷至今孤亭閒獨

有九日章昔我來齊山山僧迎道旁騎馬到寺門亂石屹若
牆值雨不遍歷但取山泉嘗牧之舊遊處苔滑履莫將卻返
弄水涯隔溪望青蒼絕頂見茆屋洪波日湯湯雲霞與雁鷺
還動秋客腸去逾十五年游宦韓陳梁哀哀邁殃禍乃再居
南方欲往尚未可追吟寄支郎

杏花村

府志在秀山門外里許有古井闌刻黃公清泉四字明天啟間顧太守元鏡作杏花亭於其地邑人郎遂有杏

花村志江南通志因唐杜牧詩有牧童遙指杏花村句得名南畿志有古石井圈刻黃公廣潤玉泉六字

本朝

周疆築杏花亭碑記

自有杜牧之清明詩後邨遂以杏花名且築亭於其中爲遊

貴池縣志

卷八

輿地志 古蹟

二十

人止息地明太守顧元鏡又建坊表之嗣是以來栽培無繼
起者杏花易而爲蔓草而亭且淪滅而坊且傾圮盛衰之理
物固有然余自壬戌冬來佐池郡南北馳驅幾無暖席乙丑
秋杪稍暇乃建坊種樹築亭次第以復前日之規模風景必
有大不同於此者予恨不得見今予所修舉何敢云無忝於
昔亦庶幾存其意俾不至截焉盡沒已耳夫樹木者不十年
而小者長不十年而長者枯矣亭與坊一往過焉新者舊矣
再往過焉舊者朽矣毀矣數十年後未知何如是所望於後
之君子雖然物有盛衰遞興遞廢因之互見獨是牧之一詩

歷唐至今已及千載曾無顯晦之殊人之所重其亦可知矣夫

又募杏花村種杏樹檄

照得杏花村自杜公畱句而後遂成千古名區聞其風者多深卧遊之思官其地者恆切春行之想但歲年既遠翦伐時侵世俗不文栽培絕少廉纖暮雨止潤桃花搖曳東風徒翻柳葉寥寥村埜無枝畱燕燕之飛寂寂江城何樹聽鶯鶯之語竹籬幾處誰停黃犢之車茅屋數間空颺青帘之影茲者時際恬熙人安康阜言瞻古陌綠徧桑麻一望新疇翠彌菽

麥擬創韻事點綴太平廣募居民董率種植或一戶而獨栽數本或數人而共樹一株其有闔屬紳袍願襄斯舉者名園購得尤稱天下瓊葩別業移來不數人間朱草務期旬日之間齊列千章之盛庶幾長堤十里燦若紅霞平野三春紛如絳雪玉壺人醉都去吟詩金勒馬嘶爭來問酒

蔣韶杏花村記

杏花村者迺唐杜司勳刺池時有牧童遙指杏花村之句而因以名焉數朝而後求所謂亭閣臺榭茅屋酒帘已邈乎其不可得矣士君子履其地見荒烟蔓草禾黍荆棘低徊畱之

不能去云今太守李公來知是邦政孚而人和公餘嘗流連
其地望古興懷於是刈穢草伐惡木規其舊址建亭種樹築
舫齋立門鑰繚之以垣刻前賢及今人詩賦於其上鑿池而
引流其黃公之井則勒碑于牆以外凡左右之稜峭高下之
參差莫不迴環獻技以成此村之盛其南平原大湖郁郁青
青因杏花以生色而杜公祠在焉北則演武廳每春日觀較
射輒爲誦庾子山芝蓋青旂二語東望城郭烟火萬家朝日
晚霞點綴如畫在若近若遠之間西矗茂林鬱鬱蔥蔥則張
氏之子姓居焉張爲前明侍郎金焦之後靖難避諱寄姓於

貴池縣志

卷八

輿地志 古蹟

二二一

張令人慨然太息而有忠臣義士之思舉向之名賢勝境一
旦而新非由興復之功亦何以致此哉雖然物之盛衰亦其
常也前之衰者至此而復盛而今之盛者又安在其不衰耶
故李公之修在杏村而其所以修者不在杏村後世君子履
其地想見其爲人有如杜公之不可沒者雖謂杏村之常盛
而不衰也可卽衰而猶之夫盛也亦無不可

唐

杜牧清明

清明時節雨紛紛路上行人欲斷魂借問酒家何處有牧童
遙指杏花村

宋
曹天祐杏花村

久有看春約今才出郭行
杏花飛作雨烟笛遠聞聲
舊跡尋何處東風暖忽生
酒壚仍得醉倚待月華明

明
沈昌杏花村

杏花枝上著春風十里烟村一色紅
欲問當年沽酒處竹籬西去小橋東

顧元鏡杏花村

牧童遙指處杜老舊題詩
紅杏添春色黃蘆憶昔時
遠山曾作畫好鳥解吹簾
偷得餘閒在官錢換酒卮

貴池縣志

卷八

輿地志 古蹟

一三三

本朝
楊森杏花村

千載詩人地無花亦此村
茂林還酒店芳草自柴門
飲有提壺勸耕惟布穀喧亭臺如可復不異牧之存

蘇汝霖杏花村

石城風景催寒食秋浦村南杏花坼
萬樹霞明鬥綺叢千林紫霧迷香國
澄湖淼淼枕層巖螺髻周遭壓鏡奩
仙客種餘春爛漫玉鞭游處雨廉纖
當時刺史誇吟筆贏得山靈紀陳蹟
一道湖莊盡酒家至今亂颭青帘出
繁弱初開角藝場花邊按部記徜徉
閒隨芳草尋樵豎此景千年非渺茫
桃源流

水津亭杏菊蘂含霜落英早何以深村絳雪飛濛濛十里東
風曉樂事應憐得句遲年年春在賣花時誰將千古風流調
獨寫詩篇繼牧之

尤侗杏花村

太守行春日山村過杏花題詩猶在壁沽酒向誰家地近芙
蓉嶺人遊楊柳衙蓬萊移種至好散一林霞
方外賢司馬西山挂笏看采風尋野老種樹問園官白浦舟
能渡黃蘆酒未殘花亭如可築遲我倚闌干

王仲漑勸農至杏花村二首

貴池縣志

卷八

輿地志 古蹟

二四

憶昔下車日良苗吐穗少愁懷問老農爲言臘雪小季春沛
膏澤五風十雨好遂歌麥有秋隴上白雲繞四月食新麥芒
種插秧稻又聞桔槔忙連朝日杲杲舉首望雲霓憂心怒如
擣會當文戰餘雷霆閃龍爪傾盆三日霖默應心香禱出郭
勸深耕歡聲遍黎老酌此壺中醕爾其卜醉飽
雲散遠山見風輕啼鳥喧掩映出茆屋陰陰桑柘繁水田起
鷗鷺柴門散雞豚從者向前說是古杏花村樊川賦詩句於
此停行軒三間老屋在俎豆緜子孫遙遙數百載人往風流
存我本識字農稼穡曾講論郡符忝初縮地瘠民實蕃及時

降甘澍共沐皇天恩幸冀歲豐稔庶幾風俗敦

南亭

池陽名勝類編
在齊山今廢

杜牧殘春獨來南亭寄張祜詩

暖雲如粉草如茵獨步長堤不見人二嶺桃花紅錦鞦半溪

山水綠羅新高枝百舌猶欺鳥帶葉梨花獨送春杜尉欲知

何處是苦吟林下拂詩塵

黃公酒壚

池陽名勝類編在杏花村相傳香泉似酒汲之不竭
今演武場前有古井酒壚遺址所存井闌有舊篆今

已泐明大尹李岐陽題杜刺史行
春處六字斷碑在井闌邊今尚存

李暘客中有懷黃公酒壚

貴池縣志

卷八

輿地志 古蹟

二五

十年萍跡徧天涯問水尋山到處家每憶邨醪神輒往若逢

寒食興尤賒黃公久冷壚邊酒紅杏頻開牆裏花勝事喜今

傳麗句高歌猶醉赤城霞

弄水亭

江南通志在府治通遠門外舊橋之西杜牧建取李白
欲弄水中月句為名府志在城南宋陸游入蜀記乾道
六年七月登弄水亭杜牧之賦詩所也
亭殊不葺然正對清溪齊山景物絕佳

杜牧弄水亭

弄水亭前溪颭灩翠綃舞綺席草芊芊紫峯嵐伍伍螭蟠得

形勢翬飛如軒戶一鏡奩曲隄萬瓦跳猛雨檻前汀雁棲枕

上巴帆去叢筠倚修廊密蕙媚幽圃杉樹碧為幢花駢紅作

堵停樽遲晚月咽咽上幽渚客舟耿孤燈萬里人夜語漫流
胃苔槎飢鳧曬雲羽絲落釣餌水鱗看吞吐斷霓天帔垂
狂燒漢旌怒曠朗半秋曉蕭瑟好風露光潔疑可攬欲以襟
懷貯幽抱吟九歌羈情思湘浦四時皆異狀終日爲良遇小
水漫石棱撐舟入幽處孤歌倚桂巖晚酒眠松隴紆餘帶竹
村蠶鄉足砧杵滕泉落環珮畦苗差纂組風俗知所尚豪強
恥孤侮鄰喪不相春公租無詬負農時貴伏臘簪瑱事禮賂
鄉效富華禮征行產強弩不能自免去但媿來何暮故園漢
上林信美非吾土

貴池縣志

卷八

輿地志 古蹟

二六

又春末題弄水亭

使君四十四兩佩左銅魚爲吏非爲吏讀書底讀書晚花紅
豔靜高樹綠陰初亭宇清無比溪山畫不如嘉賓能嘯咏官
妓巧妝梳逐日愁皆碎隨時醉有餘偃須求五鼎陶祇愛吾
廬趨向人皆異賢豪莫笑渠

宋

孔平仲弄水亭

弄水垂吾手圓波觸石隄夜深翻斗極秋霽抱虹霓鳥汎閒
相得烟生望稍迷問源思杖策人指白雲西

周必大弄水亭

夜泊清溪弄水亭棹謳徐起月華明水晶宮畔西湖上除卻
兩般無此情

卸帆亭

池陽名勝類編在池口今失其址

聶冠卿卸帆亭

錢杜遺靈在江山氣凜然鋒爭吟處敵幙隱醉中天鴟棟寒
垂雨烏城夕冒烟病餘詩思淺猶得捧殘篇

仙掌石

采訪册在梅村爪痕宛然俗傳羅隱遺跡

驢跡石

采訪册在梅村俗傳羅隱跨驢過此

羅隱宅

舊志在梅根

貴池縣志

卷八

輿地志 古蹟

二七

唐

羅隱下山過梅根

岸葉經秋墜晚枝裊煙凌鬢促征期家從澤國誰能問路在
侯門自不知但恐老侵多病日每憂忙過少年時可憐江上
人堪笑獨倚殘陽弄釣絲

又別池陽所居詩

黃塵初起此流連火耨刀耕六七年雨夜老農傷水旱雪晴
漁父共舟船已悲世亂身須去肯媿途危跡屢遷卻是九華
山有意列行相送到江邊

又春日憶池陽有寄

烟水濛濛接板橋數年經覽駐征橈醉凭危檻波千頃愁倚
長亭柳萬條別後故人冠獬豸病來知己賞鷓鴣清流夾宅
千家住會待閒乘一信潮

本朝

王仲漑訪羅給事舊居

秋水蒹葭外詩人故宅寒討梁明大義滯越老微官遺址千
秋重才名一第難淒涼江上月獨照舊吟壇

陳尉過梅根弔羅給諫

廿年火耨與刀耕每過梅根百感生場屋三羅才有數公車
十上榜無名竇君營墅成高誼鄭女窺簾罷誦聲垂老猶憐

貴池縣志

卷八

輿地志 古蹟

二八

唐社稷錢王不起越中兵

陶守立宅

齊山志陶守立之故宅在此十國春秋守立保
大間應舉不第退居齊山以詩筆丹青自娛

太尉府

舊志在府治右宋
初黃太尉置今廢

清溪亭

江南通志在清溪鎮又有清
溪館府志在城北五里宋建

宋

王安國清溪亭記

清溪亭臨池州之溪上隸軍府事判官之府而京兆杜君之
爲判官也築於治平三年某月某甲子成於某月某甲子於
是州之士樂之相與語曰夫吳楚荆蜀閩越之徒出入於是
而離堆洞庭鄱陽之水浮於日月之無窮四方萬里之人飛

帆鼓楫上下於波濤之中犯不測之險於朝暮之際而吾等
乃於數楹之地得偉麗之觀於寢食坐作之間是可喜也若
夫峙闐闐之萬家於千峯之繚繞朝陽瞳矇破氛霧於巘岼
縹緲之區而水搖山動於玲瓏窈窕之林烟雲之滅沒風雨
之晦冥天之所變隨於人之動息者也陽闢而陰闢草萌而
木芽霏紅縹紫映竹低昂與夫美蔭交而鳥獸嬉野潦收而
洲渚出冰崖雪壑桑落之墟景象之盛衰見於四時之始終
而隱顯不匿乎一席之俯仰然後知呼吸於天地之正氣而
馳騖偃伏出有人無者孰使然哉覽於是者直有以自得而

人不吾知也君曰夫憊其形於事者宜有以佚其勞饜其視
聽之喧囂則必之乎空曠之所然後能無患於晦明吾是以
治之閒隙攜同好於此而徜徉以畢景飛禽之啁啾怒浪之
洶湧漁篷樵屨嘯於前而歌於後孰與夫訟訴笏笞之聲交
於吾耳也岸幘穿屨絃歌而詩書投壺飲酒談古今而忘賓
主孰與夫擎蹠折旋之容接於吾目也凡所以娛其意者如
此而又以爲居者厭於局束行者甘於憩休人情之所同而
使者多以爲我不能久於處也室廬有忽不治者又況宴遊
之設乎俗陷於不恕而萬事之凌夷往往以此吾疾之久矣

而亭之所以作也噫推君之意可謂賢矣吾爲之記曰夫智足以窮天下之理則未始玩心於物仁足以盡己之性則與時而不遺然則君之意有不充於是歟予未嘗遊於茲而吾弟和甫爲其僚乃因和甫請而爲之記

按池州判官司軍府事溪上必另有署今地無考

包公井

在府廳事西階下知府李暉爲建包公井亭

明

葉恩包公井記畧

池陽志記郡治之蹟有包公井在郡治西偏乃孝肅守郡時所鑿予訪其蹟莫知所謂包井者惟一井在大門東南隅其

貴池縣志

卷八

輿地志 古蹟

三十

深四仞霖潦注則平或且溢不數日如焦釜日用皆汲於河僕夫以爲勞今年九月予周旋廳事前欲得宜井之地或告曰西偏階下舊有泉眼吏人汲以潤硯今甃爲路矣因所指發視之得一井堙塞殆滿上餘古甃咫尺乃捄淤土除頑石駢手偕作越三日淤盡而泉始達以尺度之其廣十有二其深倍之甃以巨石護以石闌旣訖工時久不雨又三日得雨泉泠然及井之半斟嘗之清冽異常噫此殆所謂包井也耶井無地不有而公所鑿特系其姓閱數百年而不易者豈以井哉爲之銘曰泉之清兮公之潔泉之芳兮公之烈湮而復

完太虛湛然公名與俱垂千萬年嗣而汲者尚無愧焉

觀郡樓

舊志在齊山九鼎洞後山唐建
宋知州王哲易曰青霄亭今廢

青霄亭

江南通志青霄亭舊為觀郡樓宋
王哲易今名齊山志在翠微亭東

清涼境

杏花村志在秀山門外西湖橋茶田嶺之間有秋浦亭
遺址咸豐三年兵燬同治八年鍾德安堂重建新纂

翠光亭

江南通志在池口瀕江池陽
名勝類編在池口今失其址

宋

岳飛翠光亭

愛此倚闌干誰同寓目閒輕陰弄晴日秀色隱空山島樹蕭
騷外征帆杳靄閒余雖老江上心羨白雲關

秋浦亭

池陽名勝類編在
秀山門外清涼境

貴池縣志

卷八

輿地志 古蹟

三一

宋

陳舜俞秋浦亭

牢落眞秋浦江山滯客舟身同雁南去心似水東流鷗鳥荒
烟裏漁人古渡頭只因山色好來上九華樓

望江亭

齊山圖畫志在寄隱巖上宋建明天啟中邑令李一鳳
重葺毀於兵本朝康熙初知府郭世純重建今爲大

觀亭

一覽亭

齊山圖畫志在齊山
妙空巖前宋建今廢

雲壑亭

齊山圖畫志宋建在
壽字巖之左今廢

雲巢

府志在齊山之西宋錢塘沈遼寓今失其處宋史遼字叡
達傲睨一世攝華亭縣使者文致其罪流永州赦徙池州

築室齊山之
上名曰雲巢

宋 沈遼初創二山詩

左山叢古木縈帶多美竹右山少平地硿礮斲蒼玉於此豈
無竹蒼疎倚巖谷上參九頂道俯浸清溪澳於彼豈無石嵌
崖大如屋景業讀書處基構有遺躅始吾構二山何爲不相
屬中間古蘭若臺觀當山腹巖洞七十二龍蛇所潛伏昔人
作軒榭高深寄瓷麓我乃巢西崦手自親鉏劬清溪漫無際
島嶼相重複雨餘山更佳春流漲平谷下瞰池陽市修烟弄
芳馥大江天上來淮水點眉綠老夫豈無意落日傲鴻鵠東
嶺亦誅茅小葺麤容足六峯引南睇九華勢相續白雲與誰

貴池縣志

卷八

輿地志 古蹟

三三一

期千載媚平陸清曠無俗韻修明資遠目去秋已種麥今春
復栽粟野老豈余欺東坡幸膏沐二山誰與適最與枯藤熟
相見詎無人顧我真麋鹿一年一瞬事何暇知委曲得此化
餘年不問君平卜

穆公井

舊志在鎮江門外宋靖康間有河朔道士避亂來此有道術邑人建菴爲浚此井

問蕭樓

府志宋時在試門今其地爲市門詩顛寄吳筏詩曰經年遠出是孱翁那得宵分共酒筒聞說問蕭樓作市紗

惟何處督諸童蓋指此

湯公井

萬曆府志在齊山延慶寺宋紹興間郡人侍郎湯允恭浚至今居民汲之

按桂鑿遊齊山記湯公泉今智則正德時已智矣豈

萬曆時尚可汲乎院經久廢誰復重汲且井在山半

居民未必遠汲

陳半州宅

舊志在秋浦靈田半州南渡時人富半池州故名其產各以類編今貴池之佛田唐田恭田賴田玉田皆

其莊也其行樂處標為四景後以奢僭誅今遺跡猶在云

秋浦樓

池陽名勝類編在城西路通秋浦故名江南通志在府城東宋紹定戊子郡守趙葵因舊址增築有石刻蘇軾

詞黃魯直字於壁南畿志明正德戊寅知府何紹正建

宋 趙葵秋浦樓

麗譙岩堯北城闕萬里關河歸目睫雨餘漁釣玉奩開烟外

芙蓉翠屏列吳頭楚尾二十秋滿耳絃歌聲未絕不才濫綴

貴池縣志

卷八

輿地志 古蹟

三三三

鴛鴦行夜夢時還許歸謁蕭晨振策來翠微母憐吾兒倍怡

悅昔偕汝父居是邦舊事辛苦為兒說星星鶴髮簪霞冠笑

著朱衣擁金節一門和氣皆君恩恩與天同酬未得生平區

區忠孝心歲晚願為松與柏可堪清賞屬登臨風景不殊人

事別徘徊徙倚十二闌角聲吹上梅梢月

本朝

陳寶鑰登秋浦樓

池陽半水國有水咸宜秋天洗一盆月夜沈雙玉鈎雁風吹

荻起漁火溼煙浮百里涵虛氣朝看浦上鷗

華岳宅

江南通志在府南山川壇後有岳手植松十餘株宅前石狻猊尚存桂鑿遊齊山記宋嘉平十年華狀元岳故

坊圮石
尚無恙

明
余翹華公宅

趙公墓近華公宅趙有祠堂華餒而幾度山川壇下泪松風
夜半使人悲

方以智華家松

山川壇裏華家松一陣風雷化作龍倒挂雨中將巷地等閒

卻被墨痕封

本朝
張英登齊山經華殿帥故居

樊川遊處一扶筇幾點苔痕想故蹤石影洞中驚虎豹翠微

貴池縣志

卷八

輿地志 古蹟

三四

天際列芙蓉千家迎接城南路九子移來江上峯閒客好沽
村店酒書堂醉月撫虬松

俞廷棟華殿帥故居

三載南征錄千秋北伐書臨安終棄市宋社亦成墟松柏畱
餘澤湖山想故居斯人當廟食大典至今虛

查家園

舊志南泉寺有查革斷碑查革者貴池人宋時為御史今南泉之旁有查家園

漫巖亭

齊山圖畫志漫巖前舊有漫巖亭今廢

安慶故府

府志在羅剎洲宋端平三年移治景定元年遷去

桐城故縣

舊志近李陽河名勝志宋末桐城徙治樅陽鎮又自黃湓鎮徙治池之李陽河元初遷去

九華精舍

在府學明倫堂東隅宋端平乙未郡守王伯大建

總管府

舊志在新河宋置久廢見石城筆耕

逸民釣臺

采訪册在唐村虎額山下潭上懸石方廣丈許上平如列几宋逸民唐蟄垂釣處

彭而述逸民釣臺

宋室成灰燼猶畱片石懸卻他三聘幣枕此一泓泉巖瀨風

原古松鱸味共鮮垂綸人已往潭水自潺湲

唐永賢逸民釣臺歌

上有千仞之危巒下有百尺之清湍天劈虎岡一片石幽人

穩坐垂釣竿我祖當年忠宋室徵書遠避來河干漢卿自裁

貴池縣志

卷八

輿地志 古蹟

三五

二生死奇冤莫洗清溪灘西臺痛哭徒裂竹何鄉淨土堪盤

桓公與烟霞並來往空山獨立天漫漫桃花洞口向誰語清

谷居士聯吟壇君不見潭石峻潭水寒石無時泐水無時乾

夷惠清名同不刊

翠微精舍

齊山圖畫志在繡春臺北明黃侍中觀讀書處或曰即宋書院遺址齊山志前有清冷舍一名清峭臺臺

西南數武有泉泉水出石竅中
時一上沸西有雷神殿今圯

明 王紳題黃侍中翠微書舍

環池皆名山山深積蒼翠長夏晴雪飛無雲亦陰翳屋頭有

流水時作幽琴鳴掩卷欲細聽風移過前楹

本朝
黃承祐尋翠微精舍故址

翠微堤上雲濛濛翠微亭下花成叢武穆已去子西死誰其
繼者文貞公淮清血影未磨滅羅刹歸魂尚忠烈胡爲舍宇
竟蕭條令人相對徒慨惜山僧指我層巖巔虬松老柏參青
天欲問當年讀書處惟有山鳥啼寒烟

金家井

舊志在黎家店明侍郎金焦故里族人易爲張姓

薛家園

舊志在城西宋村不知其始有石有洞有林木相傳薛氏宦後居之有詩人題詠

余德華宅

舊志明建文君出奔投宿貴池黃湓余德華家德華心知其爲建文君也上食甚恭曰萬歲異日復登大寶幸攜帶余德華也次日建文往建德莫知所之至今池人有攜帶余德華之諺云

貴池縣志

卷八

輿地志 古蹟

三六

宥忠堂

舊志在施家灣舒仲誠所居劉光謨題

又來堂

齊山圖畫志在齊山寺南府志隆慶元年馮叔吉池守至萬歷二年復以備兵至因建此堂後其壻張九德以備兵駐池復新之
肖像以祀今廢

寓思亭

杏花村志在西廟明郡守祁司員建今廢

玩月樓

齊山志寺之南偏有玩月樓府志明成化十九年僧祖瑛創邑人御史張廷瑞有記

望仙樓

舊志在張家塘御史張廷瑞爲尹蓬頭建久廢

二老亭

齊山圖畫志在齊山雲梯之東明宏治間太守陳良器爲邑紳張侍御廷瑞許侍御潛建嘉靖中太守田賦更名憩老按旁有
老人石故名

明
范吉二老行樂

謝事歸來一事無齊山勝處日歡娛翠微亭上如泥醉畱與

山僧作畫圖

三奇亭

齊山圖畫志在蕉筆巖前本宋延慶院址遷寺後爲山川壇明宏治中祁太守司員遷山川壇後爲壽字亭嘉

靖初田太守賦遷壽字亭近西始立三奇亭於此謂石鼓洞妙空巖仙人橋也亭廢嘉靖中虞巡方邦譽葺之又廢

明

李鶴鳴三奇亭記

江之南多名山並江而郡者池爲勝蓋九華之秀立傑出可以匹武夷雁蕩然僻在郡東南七十里外負郭有齊山焉高不能三十仞實多怪石人士不絕遊故嘗齊名九華然石怪狀雖多凌厲叢沓類鮮天趣維南有妙空巖者乳溜所凝結

貴池縣志

卷八

輿地志 古蹟

三七

穹若空隆紺翠蒼綠潤如過雨妙空西上爲石鼓洞洞有石旁出如肺肝白肌赤脈擊之齶然遠聞可諧箎絃又西爲仙人橋廣僅咫尺長五之虹跨兩崖膚理渾成殆造物者之肆巧維是三者於齊山爲勝前太守一竹田子建亭于其會命之曰三奇特表異之歲更而亭敗嘉靖十三年閏月侍御東崖虞子按節於池及暇從太守三峰侯子指齊山登焉迨茲亭址謂太守曰山之奇誠莫踰此子其復亭之吾聞之古君子之爲政也必時觀遊非以宣佚也蓋過勞則精滯神浮慮煩而思鬱昏怠之氣將冒沒於心而政用是厯是故君子勞

矣必有以節宣之使此心渙然怡愉清明平甯以恆吾政今
某託觀遊於茲山而茲亭實都其勝子其復之太守唯以退
已而屬邑銅陵義民徐正本正位者願效子來之義任其費
因中丞秋浦汪公以請於東崖子子嘉許之且曰樂趨公役
民之順也太守之政也可以觀風矣夏六月亭成四楹複檐
宏敞壯麗加於其舊侯子以書屬記于金華李鶴鳴乃秋九
月將晦李子適以文事至池始爲記之因以東崖子復亭之
意告後之君子

補山堂

齊山志在珠兒山嘉
靖初桂鏊讀書處

貴池縣志

卷八

輿地志 古蹟

三八

見湖亭

齊山志在華蓋洞
西嘉靖中慎蒙建

夏耘見湖亭

野水穿隄秋更清漁歌樵唱聽分明幽人最愛當湖口一夜

凭闌到五更

神交亭

江南通志在小邱山明李呈祥講學之地以遇湛若水
構亭府志邑人李呈祥與湛尚書若水講學於此因構

此亭

明

湛若水神交亭記畧

池陽有高士古源李子者謝太學隱居小邱山十餘年不出
志聖賢之道聞甘泉子而慕焉然而未嘗識面甘泉亦未嘗

識其面而知之賢而敬之曰神交矣或曰面不相識何謂神交甘泉子曰夫人皆識面淺者也而謂上下萬年識堯舜禹湯文武周孔是何面目而若相知之深焉神交也故孔子見堯舜羹牆夢周公高宗夢傅說舜夢拜平丞黃帝夢遊華胥皆心也神也神也者心之所爲也故心之神也交通也通天而天通地而地通萬物而萬物通堯舜禹湯文武周孔而堯舜禹湯文武周孔感而通之一氣也氣也者通宇宙而一者也是故一體也一體故氤氳相通痛癢相關不交而交矣嘉靖丙申八月甘泉子過池陽登九華之山古源子出迓焉或

曰子十年不爲彼鄉士夫出矣不爲郡大夫出矣而爲甘泉子出何耶曰吾爲道出也非爲甘泉子出也相見而歡若平生交焉魚水不足也執弟子禮而學焉心以相孚神以相授不待口之相語也深矣何則神交至焉傾蓋次焉故知神之所爲者可以盡心矣知心之所爲者可以知性矣知心神之所爲者可以語道矣盡心知性而存養之可與語學矣盡之矣古源子退而作神交亭甘泉子爲次第其語作亭記

涵秋亭

李一鳳遊齊山記三奇亭西上爲涵秋亭府志明嘉靖初太守田賦建有明令姚孟賢碑

明黃尊素同胡馨寰虞乾颺周玉汝集涵秋亭

鳥道縈紆百尺峯一亭傑出破空濛
霏微翠景江流外掩映
秋光草色中座客雄詞分謝李
碑文荒蘚辨魚蟲
攜尊尚欲尋幽處
煙火千家動晚風

本朝
周體觀涵秋亭

隔浦望江天瀾瀾知近遠不見江水流
但見江帆轉

得得樓

齊山圖畫志卽玩月樓故址明萬曆五年馮叔吉取岳忠武句名之舊志天啟初李一鳳易名五賢樓今圯

明
馮叔吉得得樓詩

千年片石鎮巖西何事高樓與石齊
一帶雲霞紆舊刻雙懸
日月作新題山光近壓琳宮小
海氣遙吞玉堞低
盛世不同

貴池縣志

卷八

輿地志 古蹟

四十

戎馬歎翠微得得好攀躋

休休亭

齊山圖畫志在無底洞南明太守田賦建

任柱休休亭

山山峴路險羊腸拂石峰
頭坐大荒行到可休休
便得白雲閒處看人忙

湖上樓

齊山圖畫志在翠微隄之中今爲中亭

明
許宗魯同柯獅山登湖上樓

近郭危樓俯碧湍
倦遊孤客倚朱闌
淮淝山色尊前落
吳楚江流畫裏看
旅思逢秋增短鬢
鄉心隨雁過長江
黃花白酒

登高日漁笛城笳起暮寒

更衣亭

秀山志前明遣中使諭祭昭明陵郡邑守令朝服駿奔舊有更衣亭在殿外久廢

公應堂

秀山志明時諭祭昭明中使信宿於此其制廣大高深廊廡庖廚無不畢具遺址猶存

昭曠樓

舊志在相公墩李呈祥讀書處周怡有詩後廢

陸舫

杏花村志在杏花村明知縣張燦垣建每當平湖春漲紅雨飄零之際集賓客吟咏其中雍正甲寅知府李暉即其

旁建杜公祠葺舫齋捲蓬茅店以標名勝

環碧園

舊志在柳林巷李春達園一本青陽御史方新僑居春達拓而修之有得一窩嘗因掘地得景蕭樓斷碑

閻亭

齊山志一名宛在亭在環碧亭側杏花村明天啟中知府顧元鏡建於齊山之湖心同僚屬飲酒賦詩每至達旦郡

丞何朝宗詩曰遊到夜分身帶露卻疑山翠溼行衣

貴池縣志

卷八

輿地志 古蹟

四一

紫陽閣

舊志天啟中建祠唐呂巖宋李芾仙跡也

紫芝閣

舊志天啟中知縣張燦垣新闢紫芝墩建置田租壹拾玖担五斗在獨山界僧守順治乙未推官戚良宰率諸

生陳錦宸余心傳陳錦立李元伸李元德等共新之

天柱閣

舊志在湖心寺後天啟中建後廢順治十三年徽州知府蘭一元復建

鎮橋閣

舊志在青雲隄之首明崇禎壬午廢道光元年重建改為奎星閣

樓山寓堂

舊志在舜井街之西吳應箕僑寓於此按此堂久燬光緒四年一保三一保二合議就舊址建

吳忠節公祠以左右餘基葺三保試館名曰樓山書院甫暨祠架費竭中止架朽塌後僅就北偏餘址改造書舍三間廚屋一間祠址立四至界石以待來者新纂

古雪山民釣臺

采訪册在大剡溪吳銘道刻字

凌雲閣

舊志在九華門外後又稱迴風閣今改為文昌閣

曹文愨登凌雲閣

我愛湯丞相清辭一何綺又愛杜司勳新詩淡如水今登湖
上樓悠然悟真旨華封高人雲清溪深見底杜鵑飛丹霞秋
浦澄芳芷山水漾清輝吟眺供驅使秀氣結為文風流誰繼
美古人不我見憑闌聊徙倚俯仰一放歌數點閒鷗起

湖山樓

齊山志在芝石前圖畫志史巖之阪舊有湖山樓今廢

環碧亭

齊山志即中亭閣在翠微隄

本朝程辛環碧亭

貴池縣志

卷八

輿地志 古蹟

四一

小亭如畫碧波寒水落堤高秋欲殘最是多情古楊柳畱人

容易別人難

麗星樓

舊志在西祠今廢

化日亭

齊山圖畫志五雲庵前有化日亭

得得亭

舊志李太守暉建未笥河遊齊山記亭以岳詩名故礎宛然齊山志由老人坐石右循小徑北上數十步再折

而西為故得得亭巖壁間有李太守暉書刻岳武穆詩碑

曠怡亭

齊山志距石門不十步故曠怡亭北眺長江襟帶極遠游人至此可以盤礴

古花釣臺

采訪册在湘阡口陳虞梅隱釣於此郡守柴雲巖書刻石壁

小九華亭

齊山志舊名問道又名齊華雍正間吳太守節民重建額曰小九華亭久廢

最亭高

齊山志在上
清巖東北

醒翁亭

齊山志在醒
翁巖前今廢

集仙亭

齊山志在
集仙洞前

水德亭

府志在百牙山下清溪隄知縣趙衍建年久傾
斜耆民唐繡衣倡修知府表其義行於旌善亭

本朝

趙衍水德亭記

池郡濱江而火患不息動輒延燒數十家老少受傷棲身無處慘不忍觀余泣任來晝夜救火十餘次周之既力不足聽之則情難安通報又不勝其繁意謂災難屢見必地形使然政事之餘因究黃帝地典鏡天諸宅經均曰宅有奇災須明

貴池縣志

卷八

輿地志 古蹟

四三

天卦因察來山己酉入首屬在兌宮配在離宮如此火災洛書異位之火也相其陰陽遶城三匝於百牙山前長堤中按甲方建一水德亭六合成形每方廣記六尺一寸坐亥向巳盡裝墨色前立清禮碑文後祀水德神像下甃方池橫直各闊用門尺六尺六寸池下作用亨貞並立蓋以巨石不令人見用甲合己以助龍神即用震以生離火歸本位於齊山麓建火神祠按丁方蓋兌納丁用丁以合兌兌金歸位即用兌以伏離自是以後即偶被災不過一二年家輒止既施制火之功更當遺修建之法緣己酉土脈應扞乾巽不當扞作壬山

有犯火星 以天卦主之壬位巨門丙向祿存卦與形合有子違父訓兄弟不和之應蓋因廉貞不生巨門巨門難合祿存干於丙上開門迎納坤水水屬武曲位應臨官金主四數方剛之象主官清吏檢官陞於二七之年吏敗於一代之內乾甲山低貪狼失陷主人丁稀巽辛遠秀文曲無凶主女美不淫坎癸不空廉貞無勢震庚空缺兵馬無侵水歸丑庫無山收拾富許空名後龍不補難登科甲若築土墩五箇密栽松樹千株作成排指貪狼於三台墩上一則鎮壓庫方一則迎接旺水整新橋使郡民出入由之則步步履吉官民俱有

大益奈費用不足姑存此說以俟後學繼起高明或亦許我時戊辰歲

吳德照水德亭記

池郡向多火患邑侯趙公香沙康熙癸丑進士浙江金華府東陽人蒞任有惠政兼善堪輿相其陰陽至百牙山寺前見山聳峙於南離石角嶙峋多成火曜喟然者久之爰卜是山之麓建水德亭鎮之題其碑曰清禮五行之火以五常之禮配之也其下甃以方池池底蓋以巨石其中制作秘不可知時康熙戊辰歲也嗣後火災頓息是其拯民患奠民居德澤

之被於吾池者至深且渥余懼歲久或忘其由特記其崖畧
如此公居官方直寬於待民嚴於造士迄今閱四十餘年士
頌民謳猶低徊不能置云公於百牙山曾建小閣後人即奉
其銜位於上每當公誕辰薦以蘋藻名曰趙公遺愛夫古之
有功德於民者必列諸祀典以公之深仁厚澤宜其俎豆於
池且與茲亭而並永矣

清陰亭 齊山志在雷神殿前今廢

露滴亭 舊志在齊山寺前雍正初李司馬廷弼建茶亭於寺前顏曰露滴

采霞亭 舊志在翠微隄南乾隆癸巳張觀察士範建並題

貴池縣志 卷八 輿地志 古蹟

平政閣 舊志在凌雲閣東久廢道光元年重建改名接官亭

奎星樓 在興濟橋南道光元年知縣漆日榛建今廢新纂

以上漆志附新纂

文明閣 李志在通遠門外橋之南天啟中遷

勝槩閣 李志在翠微隄崇禎初劉光謨建今廢

來鳳亭 李志在縣治衙內東南明知縣羅憲凱延禮諸生柯之來特建此居之

乾坤一草堂 李志在紫陽閣西余敬中題用杜句

桑柘門 通志在府城秀山門外虎山之東北通鱣口唐時城門名也

猗園 李志在迎恩門外劉岐築

暫園

李志在高田有宋時
桂樹吳應箕築自記

以上新增

按城鄉古蹟亭樓園圃咸豐間俱燬於兵間有僅存

及重建者已於本條下註明

一線天

係吳世尚家塾相傳其屋南向北牆繪有天文圖屋中
從無日景惟冬至午刻有一線陽光從中霽透於紫微

垣采
訪册

泉石幽居

在桂林鄭村係明萬厯間西江名士何珠
讀書處有記勒於石壁今尚存 采訪册

以上新纂

貴池縣志

卷八

輿地志 古蹟

四六

